



Broj/Broj: 4/1-50-1-9-35/06
Sarajevo/Sarajevo, 25.8.2006. godine

ZAPISNIK

35. sjednice Zajedničke komisije Parlamentarne skupštine BiH za odbranenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine

Sjednica je održana 25.8. 2006., u vremenu od 10,00 do 12,30sati.

Sjednici su prisustvovali članovi Zajedničke komisije:

Boško Šiljegović, Branko Zrno, Šefik Džaferović, Mehmed Žilić, Adem Huskić, Vinko Radovanović, Momčilo Novaković, Vinko Zorić i Halid Genjac.

Sjednici opravdano nisu prisustvovali: Osman Brka Anto Spajić, te Mirko Blagojević.

Na sjednici su bili prisutni i gosti: Marina Pendeš, zamjenik ministara odbrane BiH; Dragan Kapetina iz Predsjedništva BiH, Mario Janeček iz Ministarstva sigurnosti BiH; Dragan Mekić iz Ministarstva vanjske trgovine i ekonomskih odnosa BiH; Nedžad Hadžimusić, Edin Šehić, Svetozar Miletić, Zoran Šainović, Goran Pranjić, predstavnici Državne međuresorne komisije za PFP i NATO; Vill Thomas i Lejla Dizdarević iz Štaba NATO-a u BiH; Mudžahid Hasanbegović i Johanes Vijarek iz OHR-a; Christian Haupt, Dušan Zeler i Jasna Dragičević iz OSCE-a; Dragica Hinić, sekretar Zajedničke komisije, i Željko Grubešić, savjetnik za vojna i sigurnosna pitanja.

Sjednicom Zajedničke komisije za odbranenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine predsjedavao je Boško Šiljegović.

Za sjednicu je predložen i jednoglasno usvojen dopunjeni

DNEVNI RED

1. Usvajanje Zapisnika 34. sjednice Zajedničke komisije;
2. Razmatranje Prijedloga zakona o dopunama Zakona o odbrani BiH (predlagači: poslanik Momčilo Novaković i delegat Boško Šiljegović);
3. Informativno razmatranje Odluke Predsjedništva BiH o veličini, strukturi i lokacijama Oružanih snaga BiH (Predsjedništvo BiH);
4. Izvještaj o provođenju tranzicije u oblasti odbrane za juli 2006. (sačinilac: Ministarstvo odbrane BiH);
5. Razmatranje Informacije o uvozu-izvozu oružja i vojne opreme u 2005. (predlagač: Vijeće ministara BiH);

6. Razmatranje Izvještaja o radu Državne međuresorne komisije za NATO i PFP s Akcionim planom implementiranja aktivnosti za dostizanje sigurnosnih standarda NATO-a (sačinilac: DMK za NATO i PFP);
7. Razmatranje Informacije u vezi s tajnim zatvorima i transportima CIA-e (sačinilac: Ministarstvo sigurnosti BiH);
- 8: Izvještaj o radu Zajedničke komisije za odbrambenu i sigurnosnu politiku BiH za mandatni period 2002.-2006.;
9. Tekuća pitanja.

Ad.1. Usvajanje Zapisnika 34. sjednice Zajedničke komisije

Članovi Zajedničke komisije jednoglasno su usvojili Zapisnik 34. sjednice.

Ad. 2. Razmatranje Prijedloga zakona o dopunama Zakona o odbrani BiH (predlagači: poslanik Momčilo Novaković i delegat Boško Šiljegović)

Boško Šiljegović dao je uvodne napomene o Prijedlogu zakona o dopunama Zakona o odbrani BiH, čiji je predlagač zajedno s poslanikom Momčilom Novakovićem. Istaknuo je da je u parlamentarnu proceduru Prijedlog zakona dostavljen 20.6.2006., sa zahtjevom za razmatranje po skraćenoj proceduri, u skladu s članom 104., odnosno 99. poslovnika domova Parlamentarne skupštine BiH. Domovi su na svojim sjednicama, održanim 7.7.2006., usvojili zahtjev predlagača za razmatranje po skraćenoj proceduri. Ustavno-pravna komisija Predstavničkog doma utvrdila je postojanje ustavnog osnova za ovaj zakon 21.6.2006., a Komisija Doma naroda 7.7.2006. Na Prijedlog zakona nije bilo uloženi amandmana.

Momčilo Novaković ukratko je obrazložio razloge upućivanja Prijedloga zakona u parlamentarnu proceduru. Osnovni cilj predlagača išao je u pravcu identičnog načina rješavanja statusa civilnih lica u entitetskim ministarstvima odbrane, kao što je riješen status vojnih lica, koji su ostali bez zaposlenja zbog reforme u oblasti odbrane. **Vinko Zorić**, uz konstataciju kvaliteta predloženog zakona, istaknuo je da će ga u potpunosti podržati.

Šefik Džaferović naglasio je da je Zajednička komisija do sada riješila niz značajnih pitanja i to uz mišljenje i saglasnost Ministarstva odbrane BiH. Zato bi i u ovom slučaju trebalo zatražiti mišljenje ovog ministarstva, jer izjašnjavanjem bez dovoljno informacija u konkretnom slučaju moglo bi se doći do eventualno diskriminatornog odnosa prema drugim kategorijama lica koja također ostaju bez posla. Istaknuo je da podržava rješavanje problema za navedenu kategoriju lica. U tom kontekstu informirao je da ima dopis lica na civilnoj službi u entitetskom ministarstvu odbrane iz Srednjobosanskog kantona kojim se ukazuje na potrebu rješavanja pitanja jedne kategorije ovih lica koja imaju 25 godina radnog staža a nisu napunili 45 godina života. Ovo su inače uslovi predloženi predmetnim zakonom. U konkretnom slučaju predložio bi odgovarajući amandman za rješavanje ovakvih i sličnih problema navedenih lica, ali su mu za to potrebne dodatne informacije kojima trenutno ne raspolaže. Potom je predložio da Komisija zatraži pisano izjašnjenje Ministarstva odbrane BiH i Vijeća ministara BiH o predmetnom zakonu, nakon čega bi održala još jednu sjednicu i izjasnila se o Prijedlogu zakona.

Momčilo Novaković i Boško Šiljegović istaknuli su da su prilikom izrade Prijedloga zakona obavili potrebne konsultacije s ministrom odbrane BiH, predstavnicima sindikata i drugim činiocima u ovoj oblasti, koji su dali saglasnost za predmetne izmjene Zakona. Također treba naglasiti da ove izmjene ne bi trebalo previše da opterete penzione fondove. Istaknuli su i bojazan da se razmatranje ovog zakona neće okončati u ovom mandatnom periodu, s obzirom na predstojeći izborni proces.

Marina Pendeš informirala je prisutne da su u Ministarstvu odbrane BiH o ovom pitanju vođeni razgovori s predstavnicima sindikata, koji su rezultirali konstatacijom da je ovaj način rješavanja problema navedene kategorije lica najbolji. Zato oni podržavaju predloženi zakon.

Boško Šiljegović naglasio je da će Zajednička komisija nastaviti raditi i nakon 1.10.2006., s obzirom na način njenog formiranja.

Šefik Džaferović predložio je da se članovi Zajedničke komisije obavežu da će održati još jednu sjednicu na kojoj će se izjasniti o predloženom zakonu, i to po dobivanju pisanog mišljenja Vijeća ministara BiH i resornog ministarstva o ovom zakonu, koje bi ove institucije trebalo da dostave u roku od 10 dana.

S ovim prijedlogom saglasan je bio i Momčilo Novaković.

Nakon rasprave, Zajednička komisija jednoglasno je usvojila sljedeći **zaključak**:

„Zajednička komisija za odbrambenu i sigurnosnu politiku BiH od Vijeća ministara BiH zahtijeva da, najkasnije u roku od 10 dana, dostavi mišljenje o Prijedlogu zakona o dopunama Zakona o odbrani, predlagача poslanika Momčila Novakovića i delegata Boška Šiljegovića, kako bi ova komisija potom održala još jednu sjednicu i završila aktivnost vezanu za izjašnjavanje o predloženom zakonu.“

Ad.3. Informativno razmatranje Odluke Predsjedništva BiH o veličini, strukturi i lokacijama Oružanih snaga BiH (Predsjedništvo BiH)

Boško Šiljegović dao je uvodne napomene o Odluci o veličini, strukturi i lokacijama Oružanih snaga BiH. Predsjedništvo BiH usvojilo je ovu odluku na 98. sjedinici, održanoj 5.jula 2006., a u skladu s Ustavom BiH i čl. 12. i 81. Zakona o odbrani BiH. Ova odluka dostavljena je Zajedničkoj komisiji radi informiranja.

Potom je kraće obrazloženje Odluke dao **Dragan Kapetina**. On je istaknuo da Predsjedništvo BiH u potpunosti podržava ovakav način rada Zajedničke komisije koja želi biti informirana o svim značajnim pitanjima vezanima za reformu odbrane. Odluka sadrži sve potrebne elemente koji se odnose na strukturu, broj pripadnika i razmještaj jedinica Oružanih snaga BiH. U vezi sa sadržajem Odluke, posebno je naglasio da je vođeno računa o nacionalnoj zastupljenosti pripadnika, a da je kao osnovni kriterij za rješavanje ovog pitanja uzet popis stanovništva iz 1991., uz još neke kriterije.

Momčila Novakovića zanimala su dva pitanja. Prvo se odnosilo na postojanje jedinice aviona. Mišljenja je da je uopće razgovor o ovom pitanju neozbiljan s obzirom na finansijske mogućnosti BiH, kao i činjenicu da se želimo priključiti NATO-u i sistemu kolektivne sigurnosti. Drugo pitanje odnosilo se na kriterije kojima se Predsjedništvo BiH vodilo prilikom utvrđivanja nacionalne zastupljenosti pripadnika u Oružanim snagama BiH.

Dragan Kapetina istaknuo je da Ministarstvo odbrane BiH nije imalo dileme u vezi s prvim pitanjem. Ovo ministarstvo, s čijim mišljenjem je saglasan i NATO, nije predložilo postojanje jedinice aviona. Međutim, kako Predsjedništvo BiH nije postiglo saglasnost o ovom pitanju, utvrđen je prijelazni period do 31.7.2007., u kome bi trebalo donijeti konačnu odluku o tome. U međuvremenu ta jedinica ne postoji. U vezi s drugim pitanjem, istaknuo je da je kao osnovni kriterij za popunu Oružanih snaga BiH korišten popis stanovništva iz 1991., ali su korišteni i kriteriji kao što je operativna spremnost Oružanih snaga, moral i kohezija i puna popuna.

Mehmed Žilić naglasio je da BiH vjerovatno nema kapacitet za pokrivanje svog neba ali raspolaže značajnom i vrijednom infrastrukturom za vojnu avijaciju, tako da bi ovu infrastrukturu mogli na neki način iskoristiti i kompenzirati za te potrebe.

Nakon rasprave, članovi Komisije istaknuli su zadovoljstvo ovakvim načinom informiranja o svim značajnim pitanjima i o konkretnom pitanju.

Ad.4. Izvještaj o provođenju tranzicije u oblasti odbrane za juli 2006. (Ministarstvo odbrane BiH)

Boško Šiljegović istaknuo je da je ministar odbrane BiH, u skladu s članom 61. stav 2. Zakona o odbrani BiH, 18.8.2006., dostavio Zajedničkoj komisiji na razmatranje i usvajanje Izvještaj o provođenju tranzicije u oblasti odbrane za juli 2006.

Marina Pendeš informirala je o aktivnostima koje je ovo ministarstvo uradilo u navedenom izvještajnom periodu, naglašavajući pri tome 1.10.2006. kao jedan od najznačajnijih datuma u tranzicionom periodu. Ministarstvo odbrane BiH nada se da će do tog datuma u potpunosti okončati izbor državnih službenika, donijeti potrebna podzakonska akta i sl.

Nakon kraće rasprave, članovi Zajedničke komisije jednoglasno su usvojili predmetni izvještaj.

Ad.5. Razmatranje Informacije o uvozu-izvozu oružja i vojne opreme u 2005. godini (predlagač: Vijeće ministara BiH)

Boško Šiljegović dao je uvodne napomene o Informaciji o izdatim dozvolama za izvoz/uvoz oružja i vojne opreme u 2005. Vijeće ministara BiH dostavilo je, 27.7.2006., u parlamentarnu proceduru ovu informaciju.

Dragan Mekić istaknuo je da je ovo redovna informacija koju Vijeće ministara BiH dostavlja u skladu sa zakonskim odredbama. Ova informacija sadrži i izvještaj Inspekcijeskog tima, kao i informaciju o kontroli fabrika namjenske proizvodnje i kontrolu uvoza/izvoza oružja i vojne opreme. Posebno je naglasio suficit koji je BiH postigla u ovoj oblasti jer je dostignut izvoz u vrijednosti od 63 miliona eura, dok uvoz iznosi 13 miliona eura. U odnosu na 2004. godinu, izvoz je porastao za 55% a uvoz za 10%. U međuvremenu je BiH usaglasila i svoju legislativu sa standardima EU, što dokazuje i akt Vijeća Evrope kojim je ukinuta zabrana izvoza ovih proizvoda iz BiH.

Adem Huskić naglasio je da je sada stvarno jasno da je namjenska industrija jedna od najboljih u našoj zemlji. Zato bi i ova komisija i BiH u cjelini trebalo da nađu modus da se njen daljnji razvoj podstakne. U tom kontekstu, predložio je donošenje zaključka o potrebi osnivanja agencije ili direkcije koja bi koordinirala poslove i promovirala namjensku industriju BiH.

Momčila Novakovića zanimalo je koliko je od 129 registriranih pravnih lica, kojima je izdato 466 dozvola za uvoz/izvoz oružja i vojne opreme u 2005., zaista realiziralo date dozvole.

Dragan Mekić rekao je da je svih 129 pravnih lica dobilo tražene dozvole i da su one realizirane, pri čemu postoje neki pravni subjekti koji češće od drugih dobivaju dozvole i izvoze, uglavnom, municiju. Naglasio je da u okviru Ministarstva vanjske trgovine postoji odjel koji je nadležan za praćenje i promociju namjenske proizvodnje. U odnosu na pitanje izdatih i potom realiziranih dozvola, istaknuo je da Ministarstvo od pravnih subjekata zahtijeva da ga, nakon iskorištenih dozvola, obavijeste o toj činjenici, tako da postoji navedeni podatak o tome u ovom ministarstvu. Osim toga, resorno ministarstvo organiziralo je i ekspertni tim koji obavlja posao kontrole na terenu.

Momčilo Novaković naglasio je da je ovo izuzetno ozbiljno pitanje koje zaslužuje širu raspravu od predmetne. Zato se ne bi mogli na ovoj sjednici izjasniti o prijedlogu Adema Huskića za osnivanjem agencije koja bi se bavila koordinacijom poslova, prezentacijom i propagandom namjenske industrije. Ovo pitanje prethodno bi trebalo biti razmatrano u Ministarstvu vanjske trgovine, koje bi, u saradnji s drugim ministarstvima, trebalo dati svoje mišljenje, na osnovu kojeg bi se potom Zajednička komisija mogla izjasniti.

Mehmed Žilić podržao je inicijativu i prijedlog zaključka koji je formulirao Adem Huskić, vezan za osnivanje jedne agencije u navedenoj oblasti.

Nakon rasprave, članovi Zajedničke komisije primili su Informaciju k znanju, a potom, sa sedam glasova za i jednim suzdržanim, prihvatili i predložili domovima Parlamentarne skupštine BiH usvajanje sljedećih **zaključaka** :

„1. Zajednička komisija i domovi Parlamentarne skupštine BiH podržavaju predloženu inicijativu datu nakon inspekcijske kontrole u predmetnoj oblasti kojom je konstatirano da postoje određena pitanja koja bi trebalo jedinstveno regulirati na području BiH, odnosno usaglasiti entitetske propise,

bar u dijelu koji se odnosi na prava i obaveze pravnih lica koja se bave proizvodnjom i remontom naoružanja i vojne opreme.

2. Zajednička komisija i domovi Parlamentarne skupštine BiH sugeriraju Vijeću ministara BiH da razmotri potrebe i mogućnosti za osnivanje tijela na nivou BiH koje bi koordiniralo poslove i promoviralo namjensku industriju BiH.“

Ad.6. Razmatranje Izvještaja o radu Državne međuresorne komisije za NATO i PFP s Akcionim planom implementiranja aktivnosti za dostizanje sigurnosnih standarda NATO-a (sačinilac: DMK za NATO i PFP)

Boško Šiljegović informirao je prisutne da je, na osnovu prethodnih zaključaka Zajedničke komisije, Državna međuresorna komisija za NATO i PFP dostavila, 24.7.2006., Izvještaj o radu Državne međuresorne komisije za NATO i PFP s Akcionim planom implementiranja aktivnosti za dostizanje sigurnosnih standarda NATO-a.

Marina Pendeš kratko je objasnila način osnivanja Državna međuresorne komisija za NATO i PFP.

Nedžad Hadžimusić obrazložio je rad ove komisije. Istaknuo je da bi do kraja ove godine naša zemlja mogla institucionalizirati odnose s PFP-om i NATO-om. Akcioni plan DMK, koji je dat uz Izvještaj, uslov je za institucionalizaciju odnosa s NATO-om, a njegov osnov, prije svega, predstavlja Sigurnosni sporazum o zaštiti tajnih podataka s NATO-om. Centralni registar svih podataka koje previđa ovaj sporazum nalazit će se u Ministarstvu sigurnosti BiH, dok će se podregistri nalaziti u Ministarstvu odbrane BiH i Misiji BiH u Briselu. Na kraju je informirao da su ovaj izvještaj i Akcioni plan usvojeni u Vijeću ministara BiH. U međuvremenu je postignut visok stepen saradnje s predstavnicima Štaba NATO-a u Briselu, čija je skora posjeta najavljena, a ima za cilj praćenje stepena pripremljenosti zemlje za predstojeći samit NATO-a u Rigi. U tom kontekstu od naše misije u Briselu zatraženo je da svoje javne istupe i aktivnosti koordinira s DMK. Na kraju je predložio da se rad DMK kao tijela Vijeća ministara BiH učini u potpunosti javnim, te predložio da svaki svoj izvještaj dostavljaju paralelno Vijeću ministara BiH i Zajedničkoj komisiji.

Zoran Šainović obrazložio je posebno segmente Akcionog plana i aktivnosti koje su preduzete i koje je dalje neophodno preduzeti za potpisivanje Sigurnosnog sporazuma s NATO-om. Planom su utvrđeni nosioci aktivnosti, a sam Plan ima nekoliko poglavlja, koja tretiraju pitanja podzakonskih akata koje treba donijeti, pitanje fizičke sigurnosti prostorija, zatim propisa o sigurnosti dokumenata, sigurnosti osoblja (izdavanje sigurnosnih dozvola), informatičku sigurnost, te obavezu nadležnih institucija da planiraju budžet za realizaciju svojih aktivnosti u ovoj oblasti.

U kraćoj raspravi učestvovali su **Boško Šiljegović** i **Šefik Džaferović**. Oni su istaknuli zadovoljstvo zbog dostavljanja detaljnog izvještaja koji pokazuje ozbiljnost u radu i pristupu ovom pitanju. Posebno ih raduje informacija o poziciji BiH pred predstojeći samit NATO-a u Rigi, pri čemu treba učiniti sve potrebne korake kako bi BiH konačno postala članica PFP-a i NATO-a.

Nakon rasprave, članovi Zajedničke komisije usvojili su jednoglasno Izvještaj s Akcionim planom.

Ad.7. Razmatranje Informacije u vezi s tajnim zatvorima i transportima CIA-e (sačinilac: Ministarstvo sigurnosti BiH)

Boško Šiljegović informirao je da je Ministarstvo sigurnosti BiH, 13.7.2006., dostavilo Zajedničkoj komisiji pismo generalnog sekretara Vijeća Evrope o prijedlozima koraka koje treba preduzeti u vezi sa Izvještajem i članom 52. Evropske konvencije o ljudskim pravima. Iako je navedeni rok za dostavu komentara istekao, smatram da se još nije zakasnilo za tu aktivnost, s obzirom da će tek u septembru tekuće godine biti održana sjednica Vijeća Evrope. Ovaj materijal, po njegovom mišljenju, trebalo bi da razmatra Zajednička komisija za nadzor nad radom OSA-e, jer obuhvata obavještajno-sigurnosnu oblast.

Mario Janeček obrazložio je dostavljeni materijal. Naglasio je da su u pitanju preporuke generalnog sekretara Vijeća Evrope koje su date u svjetlu utvrđenog kršenja ljudskih prava. Ove preporuke predstavljaju smjernice za daljnje aktivnosti članica Vijeća Evrope u pravcu jačanja kontrole i nadzora zračnog saobraćaja, te nadzora aktivnosti stranih obavještajnih službi.

Vinko Radovanović imao je primjedbu na samu formulaciju ove tačke dnevnog reda, s obzirom da nije u pitanju informacija u vezi s tajnim zatvorima CIA-e, jer ovaj dokument tretira preporuke generalnog sekretara Vijeća Evrope. Zato smatra da ovu tačku treba preformulirati.

S ovom primjedbom saglasio se i predstavnik Ministarstva sigurnosti BiH, dok je Boško Šiljegović rekao da je također saglasan s navedenom primjedbom, ali je istaknuo i da je tačka dnevnog reda formulirana na osnovu naziva u zvaničnom dopisu resornog ministarstva.

Šefik Džaferović predložio je da se u potpunosti podrže predložene preporuke generalnog sekretara Vijeća Evrope, s obzirom da je BiH članica ove organizacije i mora se ponašati u skladu s utvrđenim demokratskim standardima i principima.

Nakon rasprave, članovi Zajedničke komisije su, uz prethodnu konstataciju da je predmetni dokument dostavljen Zajedničkoj komisiji s neodgovarajućim naslovom, jednoglasno podržali preporuke koje je sačinio generalni sekretar Vijeća Evrope u vezi s ovim pitanjem.

Ad.8. Izvještaj o radu Zajedničke komisije za mandatni period 2002.-2006.;

Boško Šiljegović ukratko je obrazložio potrebu da Zajednička komisija za odbranu i sigurnost BiH, na kraju mandatnog perioda u kojem je radila, usvoji izvještaj o radu i dostavi ga domovima Parlamentarne skupštine BiH na razmatranje. Nakon kraćeg obrazloženja razloga izrade izvještaja, predložio je da se daju određene preporuke domovima i Zajedničkoj komisiji narednog mandata. Radi se o sljedećim preporukama:

1. Za nastavak ostvarivanja dobrih rezultata u radu Zajedničke komisije neophodno je osigurati dobru i konstruktivnu atmosferu i saradnju svih članova Zajedničke komisije te njenog osoblja;
2. Preporučuje se nastavak izuzetno dobre saradnje Zajedničke komisije s resornim ministarstvima Vijeća ministara BiH nad kojim ova komisija ima parlamentarni nadzor, te saradnje s predstavnicima Misije OSCE-a u BiH, NATO-a, DCAF-a i drugih domaćih i međunarodnih institucija koje su dale izuzetan doprinos i podršku radu Komisije;
3. Zajednička komisija treba u narednom periodu pojačati parlamentarni nadzor u oblastima za koje je nadležna, kako bi svojom aktivnošću maksimalno uticala na otklanjanje određenih negativnih pojava u društvu;
4. Neophodno je u što kraćem roku osigurati kancelarijski prostor za rad Zajedničke komisije, te popuniti slobodna radna mjesta predviđena Pravilnikom o unutrašnjoj organizaciji i sistematizaciji radnih mjesta u Sekretarijatu Parlamentarne skupštine BiH i Sistematizacijom radnih mjesta u Sekretarijatu Parlamentarne skupštine BiH, kako bi Služba na adekvatan način mogla odgovoriti potrebama Komisije.

Šefik Džaferović u potpunosti se saglasio s predloženim preporukama, te istaknuo zadovoljstvo radom ove komisije, koja je po svojim rezultatima zaista najbolja komisija u Parlamentarnoj skupštini BiH. Na kraju je predložio da se u preporukama istakne i izuzetan rad osoblja ove komisije koje je doprinijelo ostvarenju navedenih rezultata. Naveo je da smatra kako bi trebalo svim tim institucijama s kojima je ova komisija ostvarila izuzetno dobru saradnju uputiti na kraju mandata pismo zahvale.

Boško Šiljegović istaknuo je da je planirano da Zajednička komisija organizira oproštajni skup na koji će biti pozvani svi koji su na bilo koji način učestvovali u njenom radu. Na ovom skupu, koji će najvjerojatnije biti organiziran u oktobru tekuće godine, Zajednička komisija zahvalit će svakome od njih na pomoći i podršci koju su joj dali u proteklom periodu.

Nakon rasprave, članovi Zajedničke komisije jednoglasno su prihvatili Izvještaj o radu Zajedničke komisije za mandatni period 2002.-2006., s predloženim preporukama, te zaključili da sa sadržajem ovog izvještaja treba da budu upoznata oba doma Parlamentarne skupštine BiH na narednoj sjednici, i to Predstavnički dom 29.8.2006., a Dom naroda nakon zakazivanja sjednice. Podržan je, također, i prijedlog za organiziranje oproštajnog skupa Zajedničke komisije.

Ad.9. Tekuća pitanja

a) Izvještaj o posjeti Zajedničke komisije Sekretarijatu OSCE-a u Beču, 24. jula 2006.;

Članovi Zajedničke komisije jednoglasno su usvojili Izvještaj o posjeti Sekretarijatu OSCE-a u Beču, 24. jula 2006.

b) Izvještaj o posjeti Zajedničke komisije Parlamentu i Ministarstvu odbrane Republike Slovačke, 25. i 26. jula 2006.;

Članovi Zajedničke komisije jednoglasno su usvojili Izvještaj o posjeti Parlamentu i Ministarstvu odbrane Republike Slovačke, 25. i 26. jula 2006.

c) Poziv Centra za sigurnosne studije BiH i Štaba NATO-a iz Brisela za prisustvo seminaru o temi: „Prezentacija nove agende NATO-a i nove strukture Oružanih snaga BiH“, u Banjoj Luci, 5. septembra 2006.

Članovi Zajedničke komisije odlučili su da se, po pozivu Centra za sigurnosne studije BiH i Štaba NATO-a iz Brisela za prisustvo seminaru o temi: „Prezentacija nove agende NATO-a i nove strukture Oružanih snaga BiH“, koji će biti održan u Banjoj Luci, 5. septembra 2006., upute: Boško Šiljegović, Mehmed Žilić, Adem Huskić, Branko Zrno, Dragica Hinić i Željko Grubešić.

d) Posjeta Zajedničke komisije Austriji i Francuskoj

Članovi Zajedničke komisije informirani su da je Misija OSCE-a u BiH pri kraju organizacije posjete ove komisije Beču, Austrija. Orijentaciono, ova posjeta trebalo bi da bude realizirana u oktobru ili novembru ove godine.

Također, posjeta Evropskom korpusu u Strazburu, Francuska, trebalo bi da bude realizirana sredinom oktobra ove godine.

Prema pozivu OSCE-a, članovi Zajedničke komisije predložili su da se na ova putovanja upute njeni članovi, kao i sekretar i savjetnik u Komisiji.

Zapisnik sačinila

Dragica Hinić

Privremeni predsjedavajući
Zajedničke komisije
Boško Šiljegović

